

## Iniciatiwa za Serbski sejm chutnu fazu wólbnych přihtow zahajiła



Z jednym hłosom rěčeć, to druhdy tak jednorje njeje. Wobdźělnicy zarjadowanja iniciatiwneje skupiny za Serbski sejm „zwučowachu“ sobotu w Njebjelčicach konsens namakać. Wuzwolena tema bě za někotrehožkuli wobdźělnika tróšku łośkoćiwa, wšako rozjimachu prašenje, hač mět so datum wólbow 3. nowembra wo něšto tydzenjow přestorčić.

Foto: SN/Maćij Bulank

**Njebjelčicy** (JK/SN). Wupada cyle tak, zo wotměja so wólby Serbskeho sejma kaž planowane 3. nowembra. To bě jedyn z markantnych rozsudow sobotneje džěłarnički iniciatiwneje skupiny Serbski sejm w Njebjelčanskej „Bjesadže“. Kandidaća a iniciatorojo běchu hač do wječora wo swojim džěle, ale wosebje wo terminje wólbow a pječa dalšim trěbnym času, wolerjow mobilizować, wuradźowali. Wobdźělnicy so prócowachu wuwědomić sej zmysł, wobsah a narok džěła w Serbskim sejmje. Džěše na přiklad wo to, z přećiwneju pozicijow konsens docpěć. Poradźowar Njebjelčanskeje gmejny Johannes Heimrath moderěrowaše dvě džěłarničce, při čimž skedźbni na trěbne wuchadžišća, jednohłosnje rozsudźeć, a pokaza na přikladach, kak hodža so diskusije wjesć, mysle rjadować a tak wuspěch w sejmje zaručić. „Wažne je, z kotreje strony naležnosć wobhladuješ. Njesměš pak ju při tym samu z wočow zhubić“, wón wuzběhny.

Tajke nastorki a přiklady běchu trěbne, dokelž je hač do zažneho popołdnja hišće tójšto kandidatow wahało, so za jasnje postajeny termin wólbow wuprajić. Někotři iniciatiwnicy, mjez nimi Njebjelčanski wjesnjanosta Tomaš Čornak (CDU), namjetowachu, wólby na pozdžiši termin přestorčić. Někotři kandidaća běchu sej hakle nětko tak prawje wuwědomili wažne přichodne džěło a nadawki sejma. Runje tak je džěl kandidatow za to, so hišće doraznišo wobydlerjam předstajić a ideje sejma zjawnosći jadriwišo rozjasnić. Dalši samo namjetowachu, to wosobinsce činić. Wjetšina pak wobstawaše na tym, dotalny termin wólbow na kóždy pad dodźeržeć, zo by sejm tak spěšnje kaž móžno swoje džěło zahajić móht a čas njebrojił. Třeći džěl kandidatow – běchu to ći, kotřiž běchu so hakle njedawno přizjewili – a iniciatiwnikow njemóžeše so ani za jednu ani za druhu skupinu rozsudzić. Tak wuradźowachu po přestawce w třoch skupinach, ze zaměrom so hišće w Njebjelčicach rozsudzić, wólby w nowembu wotměć abo je přestorčić. Byrnjež tale diskusija jeničce tomu služila, konsens namakać, njebě chutnosć naležnosće přewidźeć.

Za Tomaša Čornaka bě sobotna džěłarnička přiwsěm wažny krok doprědka, dokelž su so kandidaća mjez sobu zeznali a wosebje swoje naroki rozložili, w sejmje skutkować chcyc. Přezjedni sej přítomni běchu, zo sejm džěło na dobro serbskeho ludu zahaji. Kaž dr. Měrčin Wałda zjima, je so tójšto wujasniło a wučba dnja bě, zo ma so demokratisce postupować a z jednym hłosom rěčeć.